

四庫全書

經部

欽定四庫全書

經部
周易函書約註卷九

詳校官宗人府府丞臣寶光鼎

通政使司副使臣莫瞻業覆勘

總校官降調編修臣倉聖脉

校對官修撰臣吳錫齡

謄錄監生臣高伯揚

欽定四庫全書

周易函書約註卷九

禮部侍郎胡煦撰

周易下經



兌下
艮上

損減也非傷也損去下卦上畫之陽益上卦上畫之
陰損乾之君益坤之民也又澤深山高深則有損象
高則有益象

損有孚元吉无咎可貞利有攸往曷之用二簋可用享

蜀才作二軌可
用亨說文作盥

艮山兌澤互坤澤深而在地下有損象山高而在地
上有益象坤實於中故言亨大象離伏坎亦亨也互
震故利往兌口震足互坤腹而實簋象簋从竹震象
艮為門闕帝出乎震門闕而帝出用享象舊解但作
戒辭以為剥民奉君非也凡爻辭皆直言爻德如使
有亨元吉可說不亨則不吉然則辭之凶者亦可云
不如此則不凶乎易卦全吉者唯謙損家人耳損以

儉取儉用獲吉者也若認作剥民奉君不知為儉取於下損國用以益下民則必與二簋用享之旨相悖亦並未解象辭言時之義矣有孚十二字皆正言減省取下之吉有孚二字為主象下文皆有孚之吉耳有孚者深信其薄取之意為愛我也維正之供萬世常經今減於常時人君而自愛其民故獲有元吉无咎可貞之美而利有攸往二簋以下即祀神以驗之亦即上文之象二簋損象言薄也可用享有孚之象

而元吉等義皆在可字中見薄取於民者即薄用於神神必見信神且見信而況民乎國之大事唯祀與戎舉其大者而小者可知據理而論即寬一分民受一分之賜故人皆信之而君德之崇高亦由此增益矣若果剥民必致厚取厚取必當厚用顧以為薄於祀神亦云可也不自相戾乎

象曰損損下益上其道上行損而有孚元吉无咎可貞利有攸往曷之用二簋可用享二簋應有時損剛益柔

有時損益盈虛與時偕行

損下益上謂損乾益坤即下文損剛益柔也乾損一
以上行乃忽添其道二字蓋謂損益乃人君乘時大
經濟不可无道以處之此道非下所能有必得權乘
勢然後可行故曰其道上行正以卦象損在下之乾
陽上行而益在上之坤故曰上行全是乾君用事君
在上者也乾陽故稱道損字之下有字之上特加而
字便知下十二字皆由損來明謂人君用此薄取之

道自能見信云云也其下總敘全辭更連曷之用為一段不另分別註疏則曷之用二句應與上文同是一義蓋上言薄取自能信諸人而獲吉下言薄用亦當信諸神耳時兼常變言常時祀神原非二簋可享在損卦而言時則必萬不得已非常時也若在常時以下奉上亦萬古之常經名分之當然何待損乎今特言有時則必非常行之事必非平常之時可知周禮荒政當由此象出也二簋應有時見最不宜減之

事值此宜減之時自不得不因時減損損剛益柔即損下益上懼人不知損下為損乾君故曰其道上行則非在下者所能觀其特標剛柔二字剛乾柔坤乾君坤民也是即損君益民之說可知損益二卦所言上下不分君民者所損皆乾剛所益皆坤柔也乃益不言損剛而損言損剛為人知益之損上為損君而不知損之損下亦為損君故特標出剛字剛陽施而坤陰受陰陽之大義也論位則上君下民論理則陽

君陰民剛而在下本非君位故不曰損君而曰損剛
損益盈虛與時偕行是統論其理見人君奉道治民
必當因時觀大象說出懲窒豈不說減損一邊道理
顧謂為剥民乎虞翻曰中互震春兌秋故言時

象曰山下有澤損君子以懲忿窒欲

懲鄭陸作徵音止清也蜀本作證窒

鄭劉作憤止也孟作恣陸作瘠欲孟作浴一作慾

不曰澤上有山而曰山下有澤山有俯臨之義澤无
反潤之理明指恩澤下降而言若非儉取於民何由

澤之下乎既曰懲窒則必非重征暴斂窮奢極欲而
剝民者矣來氏謂損澤益山是未察損剛與有時之
義也且山已高矣何待益澤已深矣何待損如但執
上下而言不察剛柔君民之義則兌柔矣何為損剛
山剛矣何為益柔今日懲窒則非自奉之私中爻坤
土下據乾為兌悅故懲忿悅忿之反也乾三上據坤
成艮止故窒欲窒止之義也

初九已事遄往

已一作以虞作祀事坤為
事祀舊作已也荀作頗往

无咎酌損之

下三爻皆自損者上二爻皆受益者本卦損剛益柔則初當益四已事把當自己事做也舊說已音以止也謂自輟所為而速往皆損己以益人也然損剛益柔有時不可貿然以往必斟酌以損之乃可悅動遄象變坎酌象此居損初即首事者為之既豫懼其過當故曰酌損之

象曰已事遄往尚合志也

馬作上合

尚同上指四也變坎故言志陰陽正應故易合四欲

損疾而初遄往合其志矣

九二利貞征凶弗損益之

震為征兌毀折征而毀折上應止爻故征凶象離伏
坎故言志九二剛中志在自守不肯妄進故利在貞
不守剛中之德而有所往則凶凶者由兌悅變震動
以悅而動以容悅其上流為不中不正故凶弗損者
弗損其剛中之德即貞也即不往也益即利也

象曰九二利貞中以為志也

德以中為美志定則守定守定故以不損為益

六三三人行則損一人一人行則得其友

行震象坤衆象故稱友乾為人三即卦之三爻得友
即得朋三人行而損一人謂一陽既上下止二陽其
一陽損而為陰也一人行而得其友謂一陽上而一
陰下兌爻雖陰却得陽以為應也此爻與上乃損卦
中往來動用之主爻損卦得名正在此爻三人行則
損一人是說方成卦時乾坤相合摩盪之妙一人行

則得其友是已成損卦時說相應之妙卦見震艮兩
象損益即得喪人與友即朋也此之言行即如諸象
言往來上下為動用之主爻言耳蓋謂即下乾而論
止九三變去一爻而餘爻不變故曰損一人周易貴
陽之有為故止論陽爻若兼論動用之兩主不獨陽
上得陰以為友即陰下亦得陽以為友故曰得其友
舊因兩而致一遂謂初二兩陽相與四五兩陰相與
不知兩之一字原兼陰陽故有天地男女之說其綱

緼構精則皆謂陰陽兩而致一也張子曰不有兩則
无一是也觀損益二卦所損所益全說陽爻則周易
貴陽可知

象曰一人行三則疑也

一人行得友而成兩則陰陽配合而專一若三則雜
亂而疑矣易之言應兩而止矣繹曰目兩以視一而
明足兩以布一而行

六四損其疾使遄有喜无咎

離伏坎四變互坎坎為心病疾象四初相應四賴初
剛益已而損疾則初之應乎四也四既獲初遄往之益
亦能使遄往者有喜此四之應乎初也皆繫傳兩而
致一之妙也兌為悅體故有喜陰陽相得何咎之有
一曰有喜即謂損疾蓋應四而使疾損故初之遄往
者有喜

象曰損其疾亦可喜也

四得初以損疾故可喜初能損已益四亦可喜也

六五或益之十朋之龜弗克違元吉

大象離龜象坤土故言十爻比上陽坤以陽為朋也
兩龜為一朋十朋之龜大寶也或者不期而至也此
爻柔順中正得二陽以為應雖可得益然用一或字
則不專指應也本卦原以損三益上得名而此爻最
與上近是得益最親最多者故曰或益之龜固外陽
者也觀小象自上祐也可知矣因在應外更逾於兩
而致一之說故用一或字益四往益初六則親被其

益唯二最多故其辭同弗違者蓋言比也

象曰六五元吉自上祐也

徐作佑

卦本坤體得益以陽而成艮然得益者止四五而五更比上故曰自上祐與大有天祐旅上逮同皆以中陰而乘陽也

上九弗損益之无咎貞吉利有攸往得臣无家

二弗損益之益上也上弗損益之自益也居損之極獨受其益又損極將反不待損而自益也不待損而

自益无傷于人何咎之有正而吉之道也利有攸往
與悅應而見震也五止益以十朋此曰得臣无家明
此爲主爻即君爻也益初亦爲益主得告公從者爲
應即此得臣也艮象廬故曰家艮家變坤臣故曰得
臣无家師上由坤變艮曰承家家象見也此由艮變
坤曰无家家象隱也无家即公爾忘私謂應之損也
象曰弗損益之大得志也

不待損而自益其志大得可知大謂陽得志謂三陰

順承而有應與比五泰三同皆謂陰順陽也



震下
巽上

以上卦乾初之陽益下卦坤初之陰故名益損益之
上下皆論陽爻陽動而有為也益從水在器皿而益
後加水作溢耳

益利有攸往利涉大川

下動而上巽雷動風行有何阻滯故利往震巽皆木
大衆離中虛木而中虛舟象故利涉大川利往處常

利涉濟變也觀於損下為損益下為益則下之不宜損可知謂剥民者當乎

彖曰益損上益下民說无疆自上下下其道大光利有攸往中正有慶利涉大川木道乃行益動而巽日進无疆天施地生其益无方凡益之道與時偕行

損上乾而為巽益下坤而為震民坤象无疆亦坤象艮伏兌悅象陰以得陽為說此益在民也自上下下由朝廷遍及之象也乾為大明以乾照坤其道大光

乾稱大大象離互根故光道者君所奉以損益者也
此言益在君也損之損剛謂為益上亦此義也損益
皆損乾益坤特益處常而損處變故損曰有時則有
時不然矣益曰日進无疆則不可以時限矣益本損
上而君仍獲益所以名益五本中正二又應以中正
是君得其臣故利有攸往大象離伏坎大川象行震
象震巽木也上風下木而中虛仗水而行故云木道
乃行動則奮往巽則順入故日進而不可以時限无

疆而不可以地限也日謂離進謂巽无疆謂坤學問如是君之恩澤亦是此二句言人事之益天施者乾陽來初而為震地生者坤陰上四而為巽乾施則天道下濟而資始坤升則地道上行而資生所以品物咸亨而其益无方此二句言天道之益宜損宜益各有時故與時偕行

象曰風雷益君子以見善則遷有過則改

風雷之勢交相助益風雷陰陽之始見善有過皆自

初幾言也善遷者復初之幾改過者巽入之能皆益道也

初九利用為大作元吉无咎

侯果曰大作謂耕植也

大作厚事也如遷國之類是也陽稱大震為作元吉无咎者復初之交美詞非戒詞也若云其所大作必至大善乃始无咎則大吉之吉究何所指又必何如之吉乃始无咎也正因此為初六是下民卑賤之象今得上乾益而為震實為震主陽剛震動大作之利

何待言乎象曰下不厚事特添下字於上正因位卑
本非厚事之位而震動有為却由益下而來實為震
主益卦之益全在此爻恐其不知大作之利故策之
况與坤之初陰相比已不若四之近君可以有為故
特以下字明之虞翻以耕播取諸益者為大作集曰
下民愚賤彼不能自厚於所事非陽剛自上來大作
而為之所下何賴焉此解亦得益下之義

象曰元吉无咎下不厚事也

下謂坤初位卑柔順何能厚事益以剛明震動之陽
又為益主正宜有為不可安於常分此與損三益上
同義但彼為損卦則說在陰爻此為益卦則說在陽
爻皆損益之主爻也

六二或益之十朋之龜弗克違永貞吉王用亨于帝吉
二本應五然益之得名實因初陽由乾益坤因為益
主乃二獨乘而比之故曰或益之謂出應外也初坤
獲乾陽之益此獨比而最親故弗克違永貞吉者陰

居陰位而得中也王謂五以陰應陽得中而順以承之故為王用帝謂震初亨通也既順承而應五又得益於初陽若王用之以通於帝者然也王用者有應也亨帝者或益之也前三句以物理言爻德亨帝句以人事言為前三句之象也

象曰或益之自外來也

自外來謂所乘之陽來自外乾下益坤初二獨得而比之見出於正應之外也即卦辭王用之義諸卦皆

以乾坤為體其動用為主之文莫非自外來者

六三益之用凶事无咎有孚中行

句

告公用圭

王肅作
用桓圭

凶事與損四之疾同互坤變坎也復得初陽則无疾
矣此爻變坎動極而陷又處窮極多凶之地與損上
之陰相比故稱凶事謂艱難險阻利害憂患之所聚
也人當此時困心衡慮可以動心忍性增益不能則
雖凶事實所以益之故既以為益矣而又以為无咎
有孚中行者言當誠信為主以行其中道此教以處

凶事之道也告公者不敢自專坤順故也此卦下主
初陽上主四陰三去初遠而比近四陰四公位也用
圭即誠也有孚之象也見得資六四之自損亦因以
獲初陽之益也圭合信者也

象曰益用凶事固有之也

單釋凶事一句可知下文皆一義矣固有明與或益
者殊也二有外來之益故曰或益之三守固有之益
故曰益之

六四中行告公從利用為依遷國

行即損三之行中行謂自初而上於四與三人行損
一人同義告公從即得友之義初陽本居四之公位
今為益下而之初儼若商於四而四告之者故曰公
從因益之主爻實在初四故為此象遷國即在公從
二字中與損卦得友之行同義非有他義也三四在
一卦之中故曰中三之行震也四之行應震也從者
巽坤之順也中行告公從若四以中行之道告乾四

而乾四遂從之也可知益卦專主初四而四又主初也互坤國象四當內外往來之交又得乾四下益之位故有遷象五六皆陽而坤陰順比故又有從象依象此正損三與得臣无家相應之爻故有告公從象告公則不自用不自專矣

象曰告公從以益志也

坤巽皆順陰柔非有為之才故但曰志告公義自在其中

九五有孚惠心勿問元吉有孚惠我德

坎離中正之爻故曰孚曰心以乾益坤天道无妄五
適居中則惠心之誠可知巽為命艮伏兌為口皆告
問象故三四五皆言告艮止掩兌勿問象豫四之勿
疑互坎逢艮也三之告坤順也四之告下益之乾初
為卦主也五之勿問君之中德出于誠然也今益下
而下順承之是下民誠信皆以我德為之惠矣所以
元吉然曰我德則非止財利之益矣

象曰有孚惠心勿問之矣惠我德大得志也

陰爻不克自主皆曰告公四巽主而亦曰告為卦重
益下而四居震初下益之位故告而曰公又以為從
重陽之有為也九居五則有益下之權居中則懷益
下之心此心誠然何待問乎乃震四下益為初實行
也故曰行九五居中无迹可見故既曰惠心又以為
所惠者我德又以為大得志若公之能益為五所驅
使耳四益志而此大得志者四之益下是告公從猶

然資人以益也曰益志則非我之行矣五大得志是
益下之志出於自心故以為我德又以為大得志見
順而承者悉被其惠匪他人之德也

上九莫益之或擊之立心勿恒凶

窮極將反又係上損之爻故曰莫益蓋益下之乾為
初故利用大作五居尊位凡有所益皆其驅使故曰
惠心又曰得志上亦乾爻既不下益則无能益之行
又不居中則无益人之心故莫益互艮手變坎盜大

象離為戈兵盜持戈兵與動極之爻相應擊象蒙上之擊亦艮爻而大象離也擊者德不下益而人多侮耳或者外來之詞作求益不已說與勿恒左矣勿恒即窮極將反也來氏謂損之言時非常道也益之日進无疆所貴在恒不恒則不能益而不已故凶勿恒者巽進退不果也

象曰莫益之偏辭也

虞 盧孟侯俱作
偏辭周布也

或擊之自外來也

益下者乾上无益下之行又鮮居中之志故曰偏辭

見未得益人之正道也或者謂出意外與六二同但分吉凶耳偏作周布說亦似有理



乾下
兌上

夬決也陽決陰也三月之卦五陽盛長一陰將消決象水在天上勢必及下亦決象

夬揚于王庭孚號有厲告自邑不利即戎利有攸往

陰居上極王象伏艮門闕庭象乾實稱孚兌為口號象陰居亢悔之位厲象乾伏坤邑兌口告象利有攸

往壯陽升進之象揚于王庭陰爻居上志得意滿象
舊說以孚號為正名其罪與即戎何異來氏以孚號
為呼三而與之孚衆陽同志決陰安得止謂呼三當
知孚者乾陽自具之德一陰據勢崇高揚揚王庭衆
陽在下而上奉一陰故宜志得意滿也象曰柔乘五
剛不曰剛承一柔則向解作號而揚于王庭期與衆
君子同力合德未盡厥旨觀夬而和可知矣夬乾德
和兌也利有攸往乾德也

煦

按此與剝上同主上交

剥之碩果得輿為一陽臨下衆陰即此之揚庭孚號也此謂一陰驕下衆陽即剥之碩果得輿也孚者陰陽相契之理也剥之剥廬謂處窮極之位將變去而為陰此之有厲謂處窮極之位將決去而為陽告自邑不利即戒者乾陽上升有至健之性陰爻儉嗇無遠大之器唯與同體之二陽悅而受之同體故曰自邑允故曰告悅故曰不利即戒也利有攸往乾德也當與剥卦叅看詳具函書然細玩周易卦爻全以貴

陽為義則夬與剝不必同論亦其義分當爾且所貴
在陽貴其有為者耳故剝上之陽則以僅存為義而
非諸陰之所能剝陰柔靜而无為者也夬上之陰則
羣陽上進而夬之陽流行不息升進不已而有為者
也故諸陽之在爻無論應與不應皆以決陰為義此
又不可不知者也

彖曰夬決也剛決柔也健而說決而和揚于王庭柔乘
五剛也孚號有厲其危乃光也告自邑不利即戎所尚

乃窮也利有攸往剛長乃終也

乾剛進兌柔退故曰剛決柔乾健兌說德也決健之用和說之用也在事上見卦止一陰本宜主陰因處窮極將返之地故言決柔儼若主陽者亦如益五得中得位因以德惠歸之者然也陽德動而有為故周易貴陽論位則居上者勝論理則壯進者強易不書剛承柔而書柔乘剛志變也以下決上厲矣號而孚其危乃光乾德大明也告自邑不利即戎內結諸同

人不待外用其威武蓋陽性健行而上往則孤陰自然退去何待攻發哉故曰所尚乃窮尚謂陽窮謂陰也剛長乃終即所尚乃窮復曰剛長夬象剛長乃終爻曰終有凶為陰言也煦按有厲而其危乃光皆取兌象上爻說和是也告自邑不利即戎為兌上言也

故曰所尚乃窮利有攸往為乾言也故曰剛長乃終函書既成後屢經更定而剝夬兩卦終疑非周易本旨蓋緣先儒解釋剝卦咸謂衆陰剝上一陽果爾則五之一爻比陽而近宜剝莫如此爻何為有貫魚以宮人寵之詞也其不剝上也明矣六三有應而曰失

上下見此爻得上陽之助深資其力則與二四之不應不比者絕不相侔故爻詞以為无咎仍是止剥三陽非剥上也其他爻與上无比无應而皆言剥者止是各剥本位之伏陽非剥上也若非上陽獨存竟成純坤安得云剥當知天地之理无過陰陽動靜升降消長而已易卦與天地合德其陰陽之升降莫不如是剥理由乾來陰長之卦也夫由坤來陽升之卦也陰陽之理陽剛而陰柔其定體也陽君而陰民其定分也陽外而陰內其定位也陽上而陰下其定性也陽動而陰靜陽明而陰暗陽升而陰降陽貴而陰賤其定理也剥之為剥初剥初陽二剥二陽者也故初二與上无比无應而皆得言剥各剥其本位之陽也與上相應者偏得其助故以為失上下五與上比則陰陽得類故詞繫以宮人寵明陰之承順乎陽而陽之不我拒也上陽而五陰陽君也陰而居五故象之為后陰靜而中處上見廬舍之艮故象之為宮夫之

為夫亦初夫初陰二夫二陰者也陽德彰明本宜外
 見故剥于初二四皆言剥而夫不言夫者陽得其位
 也其剥之三五皆能得陽以為助故其詞若有幸焉
 至夫之三五而皆云夫夫何也其一夫則各夫本位
 之陰也三之重夫與上應而夫上也五之重夫與上
 比而夫上也剥之三五不剥上而夫之三三五偏欲夫
 上者陰順而止者也陽健行而不止者也又以見貴
 陽賤陰之義也剥取殺牲解體之名三言剥牀即殺
 牲之器也剥也者自外而揭去之稱也陽本宜外今
 揭而去之若殺牲者揭去皮膚而止存脂肉者然也
 故名剥夫決也決也者向下而深入之詞也夫由坤
 來陰本宜在下今陽復其位而據之若決陰而深入
 之者然也故名夫剥之五夫之上皆陰也剥五中而
 不外故象宮上本尊位一陰蹲踞于眾君子之上故
 象王庭明此為陽君之位非陰所宜有不主陰之義
 也陰宜靜伏今居上而顯故以為揚上居窮極將返

之地衆陽之升性必不能止所以有无號之凶大之上陰終必為陽所失故其詞危剥之上陽必不為陰所剥故曰碩果不食碩大果實皆言陽不食則言存也其曰君子得與謂上陽據下五陰坤為輿也上處窮極將返之地而陽之進退實得自由故下曰小人剥廬雖指變後說若陽之自退云耳予于函書蓋五十餘年于茲矣其約註雍正七年八月亦已刊成至十二月十三日對正訛字始悟夫剥兩卦其所以相同與所以不相同之故乃始釋然聖人韋編三絕厥有由哉

象曰澤上于天夬君子以施祿及下居德則忌

水澤高出天上必將下究夬當三月正季春布德行惠時天君象祿澤象德則澤之施也居施之反也艮

伏故也

初九壯于前趾

荀作止

往不勝為咎

卦由大壯升至五陽故與九三皆言壯初震爻足象陽前陰後陽故言前謂往決也初始事之爻故曰前變巽決躁故曰壯于前趾又曰往也前趾只言始事往則究其終也非重也居下无應恃強躁進故有此象不勝者未與陰遇與應陽均力故也凡咎皆背理者也以陽決陰非背于理但不量力不能勝耳故止

以不勝為咎毛伯玉曰勝在往前兵法也必往之道也往不勝為咎遠慮也所以戒其善往也

象曰不勝而往咎也

不勝則不必往往斯為咎往者震不勝者與應同剛與上无涉也

九二惕號

翟元荀爽作錫號

莫夜有戎

鄭本莫如字无也无夜非一夜也

勿恤

變離伏坎加憂惕象上見兌口變巽為命皆號象變離日在澤下莫夜象離戈兵伏坎盜莫夜有戎象二

不言夬且有外侵之虞居中故也中居則无前往之義復休復否休否皆中居也二唯一號字有決陰之意然亦徒存其志耳莫夜幽暗象有戎患害象即隱憂之說言惕又言勿恤者惕號為本文主象下象以人事皆惕號所寓之義言能憂惕呼號以自戒備則思慮周而黨與衆雖有隱微不測之禍亦可无患象曰有戎勿恤得中道也

得中則不恃其剛而能惕號不忘戒備故有戎勿恤

九三壯于頄

音達鄭作頄夾面也蜀才作仇

有凶君子夬夬獨行遇雨

若濡有愠无咎

頄面頤三居下乾之末上應兌口頤近口口柔而頤剛故象頤壯于頄言應陰也剝三以陰應陽則善此以陽應陰故凶君子乾三也夬夬決之又決去夫情累決之不疑也與乾乾坎坎同皆上下相接之際也壯頄有凶據應而言君子夬夬乾陽本德也此上為主象下則象以人事獨行遇雨若濡六字一義謂應

陰也他爻不與陰應而此爻應之故云獨行兌為澤
雨象遇言應也乾陽應兌則為雨所濡矣此即壯頌
之凶象愠者乾三之惕厲也見君子偶與小人相值
畢竟自心有許多不快此諸乾德粹精常若濡者故
云然也无咎亦乾三所本有此又君子夬夬之象此
與壯三皆有不中之失又有乾剛得正之美故兼二
義

象曰君子夬夬終无咎也

以終无咎釋夬夬便可知有愠无咎即君子夬夬之
義遺却有愠者凡人之行于外而有失者為過自人
責之則為尤自心覺之斯為咎故无咎二字即從有
愠出也夬夬即有愠之事

九四臀无膚其行次且

古一作趙趙馬鄭同古又作恣睢或作趺跂

牽羊悔

亡聞言不信

臀徒登切次七私切且七餘切

人腹中之物皆出于臀變坎為溝瀆臀象易中言臀
皆坎也觀姤三困初可知乾與兌先天相比故稱膚

變坎不比故无膚說詳噬嗑坎臀兌毀亦无膚次且
與趨趨同行不進也唯臀无膚故行不進足爻而當
兌毀坎陷也兌覆巽伏艮巽繩艮手牽象壯三之羊
中爻兌也六五喪羊兌變乾也夬羊亦謂兌兌主陰
謂上六也卦以決陰為義只因此爻已離下乾而與
兌主會為一卦壯陽本有決陰之勢却成悅體又在
兌後猶未至于用決故為牽羊之象牽者羊性護前
讓而先之而牽制其後往逸則繩約之欲止則鞭策

之陽順之而陰制之此駕馭之法也悔亡者无逸去
之悔也兌口為言變坎為耳痛變坎則情險性健乃
傲物也故聞言不信是則无膚次且者變坎而值兌
毀離健陽而當說體本爻之時位也牽羊悔亡對主
爻而言與壯三觸藩同義牽之雖可制羊已亦因有
所牽而不得自遂其行次且之義亦在其中悔亡云
者離乾而為悅懼其和于陰今既牽矣故悔可亡也
聞言不信與上兩象同義為變坎而當兌毀耳全是

決而不決之象

象曰其行次且位不當也聞言不信聰不明也

楊易謂聰古聽

字

震足而值兌毀坎陷故位不當聰聽也謂聽之不能明其理也爻變坎離離在坎下變坎聰象坎水淹離火不明象

九五覓陸夬夬

古一作莞

中行无咎

荀作兩物曰覓菜曰商陸孟喜覓山羊說文山羊細

角項氏謂陸為羊行之路集曰莧藜也即今灰莧按
莧陸今馬齒莧也質柔而曝之難乾是感陰氣多者
莧生于三月故三月之卦象之亦如姤取瓜象五月
所生也地之高平曰陸上六陰柔乃在九五之上非
所宜生而生故取高平之陸而生莧者以象之全是
位尊比陰而又居中之象諸爻皆遠陰此獨同體而
近則染陰深矣比近則懼其夬之不勇故以夬夬勵
之亦如三之應陰而勵以君子也凡中皆不前不後

靜而居處之象居中則懼其不勇故策之而又以為行
无咎也夬陰在上則夬者不可不和故又曰中行无咎
象曰中行无咎中未光也

夬陰則宜前進所貴在行今猶中處上為一陰所蒙
故未光若行則无咎矣

上六无號終有凶

夬終窮極三應夬夬則應我者不可號五比夬夬則
揚于王庭不可號黨類既盡孤立无與故終必有凶

象曰无號之凶終不可長也

終必為陽所決不可長居其位也



巽下
乾上

姤遇也五月之卦陰與陽遇也此縫卦之一故孔子

亦言遇

姤

古作遘鄭元同馮
椅王洙改作姤

女壯勿用取女

釋文作姤无
女字彖同

女巽壯乾也一陰而遇五陽勿用取女以其德不貞

決不能從一而終夫一陰亦微矣而聖人云然防其

漸也然陽至四乃壯理念微也陰初即壯欲念危也
壯長也六子莫長于震巽乃雷必壯于天上風必壯
于天下蓋雷愈高則愈威風愈低則愈猛故冬風必
低

彖曰姤遇也柔遇剛也勿用取女

郭京作女壯勿用取女謂脫女壯字

不

可與長也天地相遇品物咸章也剛遇中正天下大行
也姤之時義大矣哉

巽遇乾剛一陰而遇五剛皆遇也取妻非朝夕之事

故曰夫婦之道不可以不久不可與長言以柔遇剛
必不能自主而其德不貞不能從一而終也卦辭女
壯在乾巽合體上取義不可與長在以柔遇剛上取
義剛陽柔陰剛天柔地品物二句即天地而說相遇
之理中正二句即人事而說相遇之理皆即象而推
廣之也天地交泰有時而品物咸章則遇後之妙也
劉不盡遇中正而天下大行則遇中正之妙也咸章
與坤之咸亨同義第亨字說方生章字說既生而盛

耳九五中正九二得中以五遇二君臣各正其位同心一德故能使其道大行而化行俗美也天時人事遇之各有其時故曰時之義大也此姤字只作遇字說一說以時命之適然為時義之大則是以遇為无可奈何之事豈聖人立教之旨

象曰天下有風姤后以施命誥四方

命魯恭傳作令誥鄭王作誥正也

女壯一象遇一象施命一象皆主巽陰兼上卦而言巽主陰故稱后乾為君又主施巽為命誥象命令也

誥告也風行天下无物不遇姤象后施命于天下與民亦相遇也

初六繫于金柅

子夏作鏞蒼頡作𨔵晁以道曰蒼頡作𨔵王肅作柅蜀才作尼揚易作𨔵

貞

吉有攸往見凶羸豕孚蹢躅

古作蹢躅一作𨔵李茂卿作𨔵

柅音擬蹢音的躅直六切

此爻皆陰繫于陽相得之象凡在下而附于上則為繫隨之二三是也凡陰附于陽者必固故此曰繫而遯二曰執馬季常謂柅在車以金為之所以止輪後

人從之謂一陰始生靜正則吉往進則凶故以二義
戒小人因以羸豕句作不能繫說謂蹢躅為進此主
教君子言也荀爽曰柅絡繹篲之柄也來氏從之謂
篲孔用金巽為木柅象又為繩繫象變乾金象言繫
之固也貞吉者言繫于金柅前无所往則正而吉若
前有所往必至他妬則見凶矣因巽進退而躁故且
繫且往又以蹢躅為不肯前進則非貞吉之旨宋衷
曰羸大索所以繫豕也巽為股又為進退股而進退

則蹢躅也初本應四為二所據不得從應故不安體
巽為風動搖之貌此以羸豕句作雖繫而不安之象
三說當以宋衷為正凡陰皆有資于陽其有善不善
則因卦而異不可槩以君子小人言也此爻應四比
二四為正應宜其繫之極固今既為二所據故四曰
无魚陰柔无為適比于二為二所據故二遂有魚然
四正二不正故教之以繫于四如金柅之固乃正而
吉若往而之二則立見其凶蹢躅者往來不安之象

此句見陰之无為雖繫而不能自主兼貞與往之兩義而象之見小豕之與大豕雖相孚信不能暫離却常跳躍而不安此與屯初同義屯二與五為正應屯二之婚媾即此之繫也屯二比初其寇盜不字即此之往見凶也然屯初比陽陽具有為之才故十年乃字終必合也姤二以陽據陰陰實无為又居初不正雖繫正應而為二所據將必搖動不能自固故有有魚无魚之分小象所由曰柔道牽也則唯以繫而不往

為正耳若往則凶矣巽木遇乾金亦往而見凶象

象曰繫于金柅柔道牽也

不曰為劉所牽而曰柔道牽病在柔也故教之以守
正而又戒之以勿往孚字便是牽字之故總為陰柔
不能自主耳但釋金柅句不釋羸豕句可知上下文
原是一義

九二包有魚

包古作庖荀
作胞虞作苞

无咎不利賓

物在內而外裹之為包初為內上為外蒙泰皆然魚

陰物又美巽象剥變巽曰魚井巽曰鮒皆以巽為少
女取象于陰物之美者言二纏綿包裹初陰猶包魚
也自二陽以後諸陽皆以得陰為美特親則有而疎
則无耳陰陽相遇剛柔相得何咎之有有也者陰之
實也賓謂衆人自主人身外皆賓也諸陽之概辭也
不利賓即下有魚之說

象曰包有魚義不及賓也

初為二包則二為主他陽安得而有之定分故言義

九三臀无膚其行次且厲无大咎

變坎故言臀乾與兌巽皆相親故夬姤皆言膚夬兌
變坎姤巽變坎皆不親故皆无膚次且者巽伏震足
而逢坎陷也卦止一陰唯二得而有之故此言无膚
膚在外者也與无魚同皆不與陰接之象次且亦陰
柔在下之象既无所遇则无陰邪之傷故雖危厲而
无大咎厲者乾三之位也筮曰坐則臀在下故困係
初行則臀在中故夬姤係三四

象曰其行次且行未牽也

陰以附陽為美當遇之時初與四應二實比之雖有
繫應之誠而不克自由皆陰柔之故故曰柔道牽三
與初不應不比陰之孚信不為我牽故不免于其行
次且也

九四包无魚

王弼郭京
作失魚

起凶

三不言包而四言包四為正應本宜有魚者二既有
之三且未牽四雖宜有而亦无矣若據正應之理起

與二爭則必凶起凶猶起釁乾之初也

象曰无魚之凶遠民也

以陰為民對乾君言也遠民即无魚中隔二三故曰
遠

九五以杞包瓜

子夏作
匏瓜

含章有隕自天

杞枸杞杞與瓜皆五月所有乾為園瓜果象此文之
包外卦包內卦也瓜之美在中而外為膚初在內卦
之中為巽二所包二陽圓于外故象瓜之膚然五陽

又包子巽外故象包瓜杞者應巽木也以杞包瓜言雖包而仍不與瓜實近也是尚隔一層之說含章者藏其章美即以杞包瓜之義爻變離有文明之象故言章巽為命乾為天有隕自天謂此爻居天之尊位其下皆其所包故雖與初不應不比若巽命自天降下者也自天對初之極下而言言遠而踈大而普耳故以杞包瓜與含章之義皆在其中

象曰九五含章中正也有隕自天志不舍命也

專釋含章不釋包瓜則含章以下皆與包瓜同象可知中則無所不包中正見二五之相應而二中所包之美皆不能與五无涉雖釋含章而包瓜在其中矣巽為命陰為民不舍命即念念不忘斯民見五與初陰非无涉耳只因五貴而初賤陽尊而陰卑乃上陽係念于下陰故有有隕自天之象命字本天字來在天則為天命在人則為命令復初曰天心言其肆應不窮是陽之用也姤初曰命言其變化各正是陰之

用也志由中發者也姤卦主陰五陽皆欲包之然為二所據正應猶且無魚故五之隕自天志不舍皆自陽之包陰而言未有初陰應五之旨

上九姤其角吝无咎

剛而在上故象角剛上无位不遇乎初故有此象吝道也然无陰邪之傷亦无咎

象曰姤其角上窮吝也

高亢在上而絕物无與窮于所遇宜有吝也夬之趾

角兌羊也此之臀膚角雖自夬來亦變兌也



坤下
兌上

萃聚也水潤其地萬物羣聚而生也又上悅下順五
剛中應二柔中萃之由也萃古作𦰩米古卒字小篆
改米作萃說文從草卒聲卒衣之成也子虛賦翕呬
萃蔡吳都賦櫛蠹森萃

萃亨

馬鄭陸
无亨字

王假有廟利見大人亨利貞用大牲吉利

有攸往

互見巽艮木在宮闕上廟象大象坎為隱伏鬼神象
坎豕兌羊坤牛大牲象巽木尅坤牛兌毀折殺牲象
卦有觀象故鹽薦同義萃則必亨不亨何由得萃亨
非衍也萃亨即卦德以其義盡于此也假同格人必
凝聚精神然後可昭格鬼神此驗于幽為萃亨之象利
見大人亨利貞此驗于明為萃亨之象大人指中正
之五總由內順而外悅則人心極和故獲有亨利貞
也上亨字卦德之亨下亨字見大人之亨利貞因正

而利也以上皆萃亨之事大牲因精誠之象而有此
本假廟句來利有攸往本大人句來皆推原未萃之
先以發萃亨之義蓋假廟見大人止釋亨義而用牲
利往補釋萃義也

象曰萃聚也順以說剛中而應故聚也

古作故亨也

王假有

廟致孝享也利見大人亨

郭京有利貞字

聚以正也

荀聚作取

用大

牲吉

荀作利貞用大牲吉五以正聚陽故曰利貞

利有攸往順天命也觀其

所聚而天地萬物之情可見矣

地上有澤水得所聚矣坤順兌說內順乎外外悅乎
內彼此之情聚而通也五以剛中下交二以柔中上
應上下之情聚而通也故聚之聚當依古作亨字蓋
聚字之義解見卦名順悅二句止說亨義耳致孝享
者盡志以致孝盡物以致享也盡志盡物聚義也致
孝致享斯感通矣利見大人單提亨字而釋曰聚以
正可知聚正便是利貞利貞全是說亨矣天命者人
物之大始賦性之本體發而為情之根抵也因上文

順說剛中事神感人全在性情凝聚流通上說故此
遂從源頭說出天命又特加一順字與中庸率字同
義全是推所性之真故下遂說出見情因性發為情
千岐百徑總屬支流唯到所性之真是人物從出源
頭能于此處凝而聚之方能致一孔子所由曰性相
近也不知周易為言性之書然則用牲利往亦尋常
事耳何遂有天命可言若但作時命之說則下文見
情豈非无根用牲物也而所以用牲有聚而通者不

可不察此即問禘不知本天本祖之道利往事也而所以利往有聚而通者不可不察此即塞吾體帥吾性物與民胞之妙也皆聚亨與義也故下疏之曰順天命而又以為見天地萬物之情所聚本天命說即由用牲利往而推上一層也坤為順巽為命陽居天位得中而坤順于下故曰順天命天地萬物之情本同一原特舍而未發則不可見若或發而為妄為邪則又從欲而靡非順天命而出也唯順天命而出凝

聚于至誠无妄之中則鬼神同此天命人同此心心同此理故大而天地陽施陰受乾始坤生亦此聚亦此情也散為萬物形交氣感聲應氣求亦此聚亦此情也詎不昭然可見哉徐子與曰天地萬物高下散殊感則見其情之通恒則見其情之久壯則見其情之正萃則見其情之同

象曰澤上于地萃君子以除戎器戒不虞

除一作錯又作治荀作慮

澤在天上恩澤也故以施祿及下澤在地上川澤也

水之所聚故象萃除者修治備具也戒備也虞度也
謂備之以防不可虞度也水潔清之物原具滌除之
義水聚則隨水而聚者不盡潔清亦當滌除也卦辭
彖辭是說能聚之故在源頭上說此說既聚以後在
人事上說源頭則說性說情此時无甚差別故曰聚
而亨人事則在發而為情之後不无差別故曰戒備
衆聚必爭故君子除而備之大象坎伏離坎為寇盜
為弓弧離為弓矢甲冑異繩艮手有除治戎器之象

戒備隱存養省察之旨

初六有孚不終乃亂乃萃若號一握

傳民作渥鄭陸蜀本作屋

為笑

勿恤往无咎

大象坎稱孚與四正應相孚信也不終者初也但云初故知不終比初有孚盈缶由後而溯前故知始終之不二萃初不終由前而逆後若初犯之說訟初之不永亦同此義下曰若號一握皆未然之計耳互巽進退坤為終變震不成為坤有孚不終之象坤為迷

亂象為衆萃象與坤陰迷亂者叢聚故曰乃亂乃萃
兌口號象初為一數與互艮相應握象兌為說變震
笑言笑象大象坎為加憂恤象初變不成坎又互艮
止憂止勿恤象不終而亂是與羣陰萃聚時爻未變
也若號以下是與正應相聚時爻已變也若如也言
必須如此先號後笑謂由坤變震故下曰往也正應
相萃陰陽相得何咎之有

象曰乃亂乃萃其志亂也

志者心之所之即情也凡人之行皆由心之動始其
萃于此而始其亂于此而始皆定于初幾故于初爻
發之彖辭說天命又說順止是動之初幾此與坤迷
同體故言志亂

六二引吉无咎孚乃利用禴

蜀才作躍
劉嶽作爚

引開弓也大象坎又變坎坎為弓引象凡人射物必
專心于物當物之中不左不右方得命中二中應五
中故取此象中爻艮手故初曰握二曰引此爻下乘

初而上繫三牽引上下以萃于五故言引則吉无咎也吉謂得萃于五无咎謂陰陽得類此上為主象孚謂孚五利用禴言薄祭亦可交神此與五相聚吉而无咎之象特補出孚字以明吉无咎之故耳坎隱伏又見艮闕與觀之盥薦同義故言用禴此孚五之象也禴薄也夏祭名爻變成離也

象曰引吉无咎中未變也

孚用之妙全在引吉无咎中故不釋用禴初曰志亂

中之已變者也二曰未變志之不亂者也未變即孚也從中字看出萃卦全在念頭方動時說道理故彖言順天命初言志而此言未變

六三萃如嗟如无攸利往无咎小吝

爻變成咸咸三亦往吝也但咸以君子隨小人故可羞此以陰隨陽故僅小吝坎加憂應齋咨之兌口嗟象萃如嗟如者未萃之先與羣陰聚也亦如初之不終乃亂二之引然也萃非所萃何利之有往无咎謂

比四順陽故象言上巽陰陽得類何咎之有然非正應故小吝

象曰往无咎上巽也

兌陽在上故曰上巽无應故取比

九四大吉无咎

與隨四隨有獲同就時位上說不就理上說六爻初亂二引三嗟五有悔六涕洟惟四不中不正居多懼之地獨與陰接三陰順之自然相萃不勞心力故大

吉說體而衆順則自心无咎人亦必无咎之者矣

象曰大吉无咎位不當也

既曰大吉又曰无咎者以此居多懼之位而九陽居之本應有咎今位之不當而獲此大吉故特以无咎明之

九五萃有位无咎匪孚元永貞悔亡

三陰順而萃四五雖居尊不與陰接是萃而但有其位者陽剛中正无愧大君之宜故可无咎然陰與四

接而此實隔四故又有匪孚未能即萃之象又言若
未見信于人必至有悔又當修其元善永長貞固之
德不可徒恃有位之權勢而使匪孚者終至于孚則
既有其位又感以德匪孚之悔庶可亡也萃之為義
陽爻皆可言之只為遠陰故有匪孚以下之象不可
以為分萃小象曰志未光豈不為徒有位而无德乎
象曰萃有位志未光也

坎故言志伏離明德幽坎中故未光與屯五夬五同

義皆允變震也蓋陰陽相說相比此未光也又變震
為情動性順此未光也變豫和樂此未光也陽與陰
聚又說又動又順又和樂安得志之光明如此則有
位无德言此欲其修德免悔也觀上亦欲下陰之順
而獨據于五故小象以為志未平與此同義

上六齋咨涕洟

虞李咨
作資

无咎

齋音咨又將啼切
洟音夷又音剝

齋持也遺也持以遺之也坤為財巽為進互艮手持
遺象謂因財物而致孝享也爻謂以憂愁涕淚之狀

齋之以告于神明也兌口咨象又為澤涕洟象自鼻
出曰涕自口出曰洟艮鼻離目體大過死象故云然
陰處萃終无位无德无應求萃不得可懼甚矣誠能
憂危之甚深懼以圖存至于齋咨涕洟則危者可平
得安位而免禍可无咎矣水潤澤其地萬物羣聚而
生乃天地生物不測之道故六爻皆无咎
象曰齋咨涕洟未安上也

不安上者不以在上之位為安因順而萃者皆在下

也



巽下
坤上

木生土中長而益高升象巽進坤順而无阻升義也

升

鄭元
作昇

元亨用見大人

古或
作利

勿恤

句

南征吉

升進而上也此進彼順德之升也木生地中勢之升

也故大亨見大人南征即升也勿恤與吉即元亨也

通主仕進說用見者因六五之用而見之與六四用

字同大象坎恤象入而順故勿恤南征者來氏易溯

野同錄俱以由巽轉坤為南行謂後天圖二卦皆南也然有升義无吉義矣須知吉字即在南征字中陰陽之理无過進退卦爻之氣又皆自下而上凡卦下內而上外內北而外南今內巽進而外坤順故南征吉左傳論復卦以為南行推陰是其義也巽陰始坤陰盛陰位定于北其征也必南行就陽陰質本降既已南征故謂為升何況中互震兌震一陽出庚兌二陽見丁再轉則為南乾盛滿之候陽氣進盛故吉用

者因陽而見陽有為也見大人即人事以釋之南征則論理也易中據互卦而論爻者睽蹇互坎言時用泰五互雷澤言歸妹萃三互巽言上巽也

彖曰柔以時升巽而順剛中而應是以大亨用見大人勿恤有慶也南征吉志行也

柔以時升三句皆升而元亨之義巽卦主柔故為柔卦以時升謂巽之上也在下則未升之時故曰以時升指為綜卦則是降而非升謂自解三升四亦非主

柔之義或指六五則六五已上非以時之謂也巽而
順據二體言剛中而應據二五言皆所以大亨者也
有慶即勿恤也志行者大象坎中爻震也謂九二之
志大行皆升義也南征即上進也故釋為志行筮曰
萃剛中在上其勢必萃升剛中在下其勢必升故萃
以五為大人升以二為大人用見者六五也上見下
非虛心下士不能故曰用見揆曰勿恤者慮巽柔不
果故掖而進之即三之无疑也慶即二之喜志行即

五六大得志也

象曰地中生木升君子以順德積小以高大

王肅作慎德姚作得

徐作以成高大

坤為順為積為小巽為高坤順之德即含宏光大品物咸亨也坤土生物積漸而升由小而大故君子法其順德

初六允升

說文作允升

大吉

允信也土德也初與上卦皆陰土故也與二陽同德

而進其升進之志合矣與坤陰同德亦與順受之志合故大吉

象曰允升大吉上合志也

說文允作執

雖與四无應而却與坤順同德大畜之三與上同陽故曰上合志此與四同陰故亦曰上合志

九二字乃利用禴无咎

與萃二同辭皆剛中有應也以誠實感則應以虛中以虛中感則應以誠實故也變坎故言孚變見坎艮

故言祭祀有應而升故无咎不言升者剛中而應不待言升也

象曰九二之字有喜也

有喜者喜其得升也誠信之至君必信任之中爻允
悅喜象

九三升虛邑

坤為邑四邑為邱四邱為虛綠荷包飯赴虛人即此
虛也邑則无所不納故言虛陰爻兩開亦虛象坤具

含宏之德順受之能陽性上行由三而升如虛邑然
故有此象

象曰升虛邑无所疑也

陽雖升性前有所阻則不能无疑爻變坎疑象然却
在其後故曰无疑坤順于上虛以受之故也

六四王用亨于岐山

一曰亨
即亨字

吉无咎

伏乾為王變震帝亦王象王謂五物兩為岐坤土兩
拆象隨兌為西故曰西山此兩拆故曰岐山亨通也

與公用亨于天子王用亨于西山二亨字同即用見
大人之用言王欲用九二乃用四通岐山以求之蓋
下三爻皆升進之賢上三爻皆用賢之人非此一用
則初无由允二无由孚三无由升矣四居内外相接
之間動與三接三艮爻而比三之二與三同德儼若
承五之四通于岐山故歸功于王用人臣无專主之
義也若但目為享祀與升卦何涉四爻皆言升而二
五獨言用五君二臣升之最切者也上順以求之下

巽而進之相應如此故吉而无咎四為順體上奉五而下比三故為此象賢非王所盡知得虛公之臣用之以通于不一之山求賢之道自合如是

象曰王用亨于岐山順事也

如云順以求賢之事下比巽入之賢上藉王之用我則順以求賢之事也因此辭說在用邊故孔子說出
事字

六五貞吉升階

五正虛公用賢之王剛中而應者也貞者位之正也
吉者求賢得賢國之大慶也升階指諸賢得所升也
論應雖專指九二論大公之心則巽體皆升進之賢
階階級巽為高坤為積土震為升五位非臣所宜升
故但曰升階如言陛下也

象曰貞吉升階大得志也

大得志即彖辭有慶志行也


上六寔升利于不息之貞

冥同冥豫謂升而不知止也坤為迷迷極冥象不息之貞天理也言此不已之心但可施之于不息之正理則利他非所利也冥豫動體故教之以渝冥升順體故教之以貞揆曰乾坤至萃升而終後此乾坤不復見經矣

象曰冥升在上消不富也

富有之謂大業謂坤也坤陰有形可積故言富此又窮極將反變而從乾故添在上二字而以為消不富

也有形者消而不富无形者原无可消不息之利自
不待言



周易函書約註卷九

欽定四庫全書

經部

周易函書約註卷十一

詳校官宗人府府丞_臣富光鼎

通政使司副使_臣莫瞻菴履勘

總校官降調編修_臣倉聖脉

校對官修撰_臣吳錫齡

謄錄監生_臣高伯楊

欽定四庫全書

周易函書約註卷十

禮部侍郎胡煦撰

周易下經



坎下
兌上

困窮也澤水下漏枯竭无水困義也訂曰雜傳以通
與遇對舉則遇為相抵之象煦按通亦是著力字猶
去滯去壅之說非如亨通之通无阻者也

困亨句貞大人吉无咎有言不信

困亨二字舊合解謂身雖困而道亨夫身之困矣道
烏能亨亨貞舊亦連解謂處困能亨則得其正說作
戒詞皆于理解未透夫元亨利貞固一字一義也觀
彖詞困而不失其所亨則亨字一義矣又曰貞大人
吉則貞字又一義矣夫唯不亨然後名困今曰困亨
謂困而求亨也陰陽迭運循環不息若使天人氣數
鎮常滯塞不通何由名易睽之言同言通艮之言行
皆此義也此卦坎陷于內其困可知而兌說于外其

中不至大傷則猶有可享之理今困而求亨其唯守
正又是大人乃為吉耳貞謂二五得中大人陽德謂
二五剛也故下曰以剛中也上言不失其所便指剛
中之二五下言君子便指陽剛之大人可知亨非自
然之亨乃言處困之道合如此耳无咎即剛中盖身
既困矣宜為咎之所集今剛而中故无咎兌口言象
坎水而塞其下流坎為耳痛有言不信之象見處坎
之險不可尚兌之口也盖兌口在外處窮極之地非

困時所宜故曰尚口乃窮也

彖曰困剛揜也

馬作掩虞作弇

險以說困而不失其所亨

郎顗傳引

此无亨字

其唯君子乎

揚易改此句入文言難免割裂矣

貞大人吉以剛中

也有言不信尚口乃窮也

此卦二主內剛中正而外柔窮亢故并主剛爻然坎剛為兌柔所揜得中之剛俱為柔揜故名困險內而說外險性說情故云險以說困則險之故不失其所則說之能此其所以亨也所字指剛中貞正也中也

大人有陽德者剛之謂也剛而中則能不失其所故
亨困則宜乎有咎剛中而不失其所自无咎兌口言
也不信坎之耳痛也兌口在上處窮極之地故曰尚
口乃窮此明不主兌柔之義

象曰澤无水困君子以致命遂志

澤水下漏而上枯故困致命遂志皆不失其所之事
命者志之原志者命之發致命者窮理盡性推至于
極而達天也雖有殺身成仁之義然儘有不必殺身

而仁可成者矣遂志者孔顏之樂為不厭誨不倦也
身之困矣天下事皆無能為可為者身心性命事中
耳致命者坎陽之陷于中遂志者兌說之見于外也

初六臀困于株木

陸德明
作朱木

入于幽谷三歲不覿

臀坎象人之體行則趾在下坐則臀在下今在困初
故象臀困本滯塞不通故不象行而象坐株根株上
互巽也初在坎下故象木根柔則无才時地皆不可
為故其困如此卦詞本以柔揜剛至逐爻而論則皆

有困義坎隱伏谷象初陰在下尤暗之甚者故象幽
不覲本幽谷來言至三歲目无所見象幽甚也互離
揜于坎水離數三也首句言困下二句言暗

象曰入于幽谷幽不明也

郭京无
下幽字

言幽又言不明幽暗之甚无復通明振拔之期也

九二困于酒食朱紱方來

鄭作
朱紱

利用亨祀征凶无咎

本義

亨作
享

易中言酒者皆坎言食者皆兌故震互坎言酒食未

濟與坎皆言酒需互兌兼言酒食困于酒食厭飲苦
惱之意澤水下漏爻沒坎中是為酒食所苦而受其
困者凡人不遇憤懣難舒多縱恣于酒食東坡謫黃
州稱為酒食地獄即其象也既不克有為則征凶可
知不可作艱于酒食如顏子簞瓢之說君子之志僅
在溫飽乎酒食之困在人心腹陽陷陰中之象亦不
可作得所欲之多蓋醉飽失宜乃困後之病此為貞
大人吉剛中之爻下言朱紱方來將可有為自不應

作如此辭互離朱象巽繩紱象坎北離南離在二前
澤水方漏故曰方來盖向明垂裳之爻也朱紱者組
綬用朱也本義作蔽膝謂取行來之義方來者其德
升聞上所舉用也坎隱伏有人鬼象故言享祀利用
享祀誠而有應即坎之有孚心亨也征凶見所處之
時位不宜妄動然剛而得中故于義為无咎首句言
現在之位方來言向後之時用享祀勉以輸誠征凶
勉以守靜與五同德曰有慶曰受福正所云貞大人

吉以剛中也朱紱君紱也指五言赤紱臣紱也指二言

象曰困于酒食中有慶也

爻之時位止困于酒食一句方來句未然之事享祀
征凶皆因現在之時而言故止釋首句中即剛中有
慶即朱紱方來

六三困于石據于蒺藜入于其宮不見其妻凶

兌剛鹵伏艮石在前堅而不納困石象坎為叢棘蒺

藜有刺同體在後不可依倚據蒺藜象坎為宮巽為
入離目變乾入宮不見象中男少女夫妻之義乃坎
中兌中是陽非陰入宮不見妻象虞以應上為妻三
柔不中不正與應同陰欲推四以上進而堅不可動
則前困者无情欲倚二以為安而銳不可依則後據
者有刺上柔不能相應如入宮不見其妻者然也是
則室家且不能保將喪亡矣其凶可知三變大過棺
槨具焉故大傳言死亡

象曰據于蒺藜乘剛也入于其宮不見其妻不祥也

二剛在下故曰乘不祥者死期將至也

九四來徐徐

子夏作荼荼翟子元同王肅作余余

困于金車

古作興

吝有終

徐徐言來之緩也四剛初柔四本足以拯初而其來

甚緩以四困于金車也兌金變坎車金車象坎險故

困往而取應復歷坎險亦困也凡困皆本爻謂初困

于下非也觀小象曰志在下則徐徐之來指四可知

徐徐巽進退不果象四剛不能援賢拔滯徒為人困

豈不為吝然邪不勝正得相與之陽合力以濟徐不終徐困不終困與正應合而有終矣言終變艮也

象曰來徐徐志在下也雖不當位有與也

謂之徐徐初困而望拯之迫也四既來矣故以為其志在下不當位對剛中之五言也志既在初故雖處不當位不能速濟然得剛中之大人同德相比兩剛合力冒難涉之險用以拯初則邪不勝正故能拯困而有終也

九五劓刑

荀王陸作髡髡鄭元云當作倪倪說文劓作劓晁氏作梃抗即髡顧考異曰應作髡髡

困于赤紱

鄭本朱深為赤

乃徐有說利用祭祀

一作享祀說音悅

允伏艮鼻象截鼻曰劓去足曰刖允為毀折伏艮為

閹寺刑人互離戈兵變震動上下體俱刑傷劓刑象

赤紱臣紱也互離巽與二同二為五之遠臣困而待

拯而三揜之四為五之近臣不當位而待拯而三比

之是五所應比皆為三困而五亦因以困矣故曰困

于赤紱劓刑困象然五實剛中貞吉故又有徐有說

利用祭祀之象允為說見久必有說不終困也五四
皆陽而皆曰徐解難貴速允為說體必至迂緩也利
用祭祀又徐有說之由蓋謂誠信孚于近臣久必藉其
力以獲福五為君交剝則上下交責之象困赤紱
則剝削之故求賢難也徐有說久而獲助也利用祭
祀徐說之由誠求之象也即彖所謂亨故小象曰受
福

象曰剝則志未得也乃徐有說以中直也利用祭祀受

福也

上下受傷故志未得坎爻應坎故言志中直即剛中

貞吉也

上六困于葛藟

古作藟

于臲卼

說文作剝

曰動悔

句晁氏云曰字疑衍

或錯簡也

有悔征吉

句

○

臲音臲卼五骨切

艮為山為徑路為果蓏蔓生曰蓏應坎陷為叢棘為蒺藜皆葛藟象第蒺藜伏于地下故坎在下者象之葛藟緣木而上故在上應坎者象之且巽柔木應巽

而高出其上故象葛藟葛藟纏束之物是靜時不得動之象艱危動不安也是動時不得少定之象曰者兌口也心語也曰動悔是靜時之懸揣覺動則必有悔也有悔者是動後之悔悔從前之不動也觀下緊接征吉二字小象曰吉行可知貴動矣此為困極將變之爻故為此兩象

象曰困于葛藟未當也動悔有悔吉行也

柔處困極才弱時窮不若五之剛中故曰未當指位

言也明知動則必悔乃寧有其悔不甘穆處斯能獲行之吉因其以柔應柔居位不當故策之



巽下
坎上

坎上巽下巽木也入也木入于下而水出于上故為井伯益始作井一曰黃帝剏百物始作井立邑相泉市鄉井皆取象焉田取四分之象井取八一之象四井為邑煦按兌巽皆具半坎之形兌陽動于下故漏巽陽動于上故上升卦亦此義升上无陽則以二陽

之升為義此上有坎則以上水為義可以觀陽德矣
井改邑不改井无喪无得往來井井汔至亦未繙井羸

其瓶

鄭元作藁
蜀作累

凶

○汔許訖切繙音
橘羸律悲切

來矣鮮曰井綜困改邑不改井者巽為市邑在因為
允在井為巽則改為邑矣若井則无喪无得上下皆
井而不改也在井坎往于上在困坎來于下剛居于
中往來不改故曰往來井井來氏言綜唯此卦最常
然止是一覆之義固不必巧立綜名易遯曰改邑不

改井乃以剛中也剛指五由全震四變得升五變得井升之坤爻原稱虛邑升變井而坤邑改故曰改邑此後大過隨再變而井之中爻不變中陽為井泉故曰不改一說井體有常而不遷邑可改而之他而井不可改可遷改則有喪得无遷改則无喪得而往者來者皆井其井井之用也胸按无喪无得即隨汲隨盈不少欠缺不見增長之義因艮為喪朋震為得朋今中爻有兌而无艮故无喪下卦有巽而无震故无得

卦見坎月而震艮俱伏故云然耳希夷有索之義最
妙唯坤始有得朋喪朋兩象試觀坤上乾下則互見
得朋之震故為泰乾上坤下則互見喪朋之艮故為
否自坤以下凡言利言得者皆震言不利言喪失者
皆艮悉由坤象出也若坎則上往下來皆坎故无喪
得此上發明利養剛中之義已完往來以下俱本无
喪得來見利養之功羸瓶之凶皆人之用于井非井
德之本然亦愈見井之无喪得也往來井井往來者

人也利養之功唯人得之而井則何得故孔子釋為利養井又隨取隨盈繙井羸瓶人不得其利養耳而井則何喪故孔子釋為不窮繙井索巽為繩繙象離中虛瓶象羸弱也力弱不勝其瓶墜落于井也虞翻曰汔幾也巽繙離瓶互兌毀折故羸其瓶一曰羸敗也巽木見兌毀也

彖曰巽乎水而上水井

下當接改邑不改井二句

井養而不窮也改

邑不改井乃以剛中也

虞本補无喪无得三句

汔至亦未繙井未

有功也羸其瓶是以凶也

古文作巽乎水而上水井改邑不改井乃以剛中也无喪

无得往來井井養而不窮也郭京徐氏王昭素改邑不改井下有无喪无得往來井井八字

此當依古為正孔子小象每有省文至于彖傳從未輕刪文王卦辭也巽水謂陰下為巽上水謂陽上為坎木入水出井象因巽有木入二義所以有轆轤桔槔之說然觀羸瓶三字則古者取水不盡用木盖取木義少入義多也以剛中在困既兼五而言剛中在井亦宜兼二以言剛中謂剛則不懦為能堅久中則

不過為得可久之道故能卓然自立終不改易此正
發利養不窮之源頭无喪无得往來井井井養而不
窮也三句應補入剛中之上蓋必往來井井方始見
得利養不窮而利養不窮又即寓有无喪无得之義
夫利養之功歸于人則井无得其出不窮未有欠缺
則井无喪所由曰往來井井井養而不窮也汔至而
未有功見功之有无歸于人則井之利養而无得可
知羸瓶而致凶見所喪亦歸于人則井之无喪可知

羸瓶之凶即本未有功而言孔子三句雖分釋仍一義也集曰先天巽即後天坤方後天坎即先天坤方環為四時勞齊役三合也穿土中而得水土木皆天一陽之用也照按先後天說最合易理因坎巽在先後天俱與坤易故穿地可以得井因坤有得喪之分故坎巽相合之卦遂言得喪因後天一圖滅坤而為坎故曰改邑不改井三合之說亦極自然看卦爻者不可拘執一義

象曰木上有水井君子以勞民勸相

木上有水浸潤上行木得所養矣木之枝葉花實皆
緣水氣上行而生每朝花葉皆見垂珠水氣隨陽上
升可知勞民勸相全是養民之事勞民以君養民又
勸之使自相周恤彼此互養也坎為勞卦巽以申命
有勸義焉元公曰風行水上為渙風行水下為井則
井泉之逆上亦地風所吹乎五德用事水木相通故
當閉藏時則木氣入于水下而井為溫及發生時木

氣出于井上而水為溢木氣出入唯井可見

初六井泥不食舊井无禽

坤居井下陰濁近水之土故象泥兌口故言食今覆
巽而在兌口之下兌口同陰不應不食象坎象小過
故言禽師五有禽坎變坎也比五失禽坎變坤也上
坎下巽巽深入禽高飛遠翥安能深入故恒井二卦
皆无禽食用也井以得水易汲為善以上出為功故
初則不食二則漏三則求王明四則修井唯五六則

易于汲取故五六獨善初居下則水不上出而无功
故為不食不食則无井旁汲水之餘瀝禽亦莫之顧
矣崔憬曰禽古擒字獲也无禽言无獲也輔嗣以最
下无應為无禽又曰井虚而泉實則未知坎以中陽
為泉陽虚乃克流通善運也

象曰井泥不食下也舊井无禽時舍也

居下則无上出之功為時所棄所以禽莫之顧

九二井谷射鮒

荀作取鮒

甕敝漏

鄭作甕敝

此爻象泉下陰兩開谷象變艮二在艮下亦谷象坎
弓在上射象巽為魚鮒象鮒小魚魚陰物初陰在下
故象魚井道上出今上无應而下比初則是谷水下
注唯及于魚故曰井谷射鮒言止能下及小物耳甕
敝漏取水下注不汲之義言无與于人也互離甕象
兌毀敝象下陰有坼漏象上水下入亦漏象上句謂
僅能浸潤于小物下句謂功不上行

象曰井谷射鮒无與也

釋文作无與之也
徐作則莫之與也

二雖剛中象泉然上无應與為之汲引所以僅能下

及

九三井渫不食

史記渫作泄
今石經作潦

為我心惻可用汲王明並

受其福

卦中三陽為泉三陰為井渫者治井而清潔亦有泉
者也爻變震滅兌口不食象我三自謂也變坎加憂
惻象互離明象王指五三五互離王明象以陽居陽
本可濟物奈未離乎下雖與上為應上柔不能汲引

无以成利物之功故有井渫不食見者為我心惻之
象然三陽清潔固可用汲之泉幸與用汲之五互為
離明果得明于知人之王舉而用之則上有功于王
下有功于民而施者受者并受其福矣洵而清之曰
渫巽白潔象

象曰井渫不食行惻也求王明受福也

行惻行道之人亦惻也由兌變震故因不食而言行
五非正應因互離而及故言求求者非應而別于應

也

六四井甃无咎

甃側救切

甃砌井也坤陰為土互離離火燒土為瓦故曰井甃
初為泥三之漂漂其泥也二射鮒四之甃甃其谷也
既漂且修井日新矣寒泉之來井養其有窮乎井道
以陽為泉陰雖得正終无及物之功故言井甃井甃
則可以蓄泉而待汲何咎之有

象曰井甃无咎修井也

修井蓄泉以待用故无咎三渫四甃皆人事故言于人位

九五井冽寒泉食

冽甘美也變坤為甘以陽居陽下應巽白為潔寒泉泉之美者食對下不食言即井養不窮也盖泉以寒冽為美井以得食為功五在兌口上食象乾為寒象曰寒泉之食中正也

陽剛而得中正下應巽木功足以及人故曰食

上六井收

荀作井麓
俞琰作汲

勿幕

干寶作
固幕

有孚元吉○

幕音
莫

虞翻曰偶畫在上有轆轤雙柱對立之象旋坎輪以收巽繩故為井收來矣鮮曰收成也物成于秋故曰秋收井收者井已成矣即小象大成之成幕覆井具坎陰在上偶畫開而不掩勿幕象孚信也習坎有孚彖曰水流而不盈行險而不失其信皆自不窮處見其信也取之不窮給之亦不窮若要結而出于至誠者然元吉即從勿幕有孚見其澤及人井養不窮之

功也集曰井鼎四以下不言吉五上吉易貴用也他卦上為窮極井鼎大成故元吉在上

象曰元吉在上大成也

大成井養之功大成也蓋寒泉雖可食使掩其口則人不得食或不孚信有時而竭則澤不及人何能大成元吉以澤所及言大成以功所就言始末揭上下字見井之用在以上上出為功者也



離下
兌上

革變也澤上火下火燃則水涸水決則火滅又中少
二女同居少上中下志不相得故其卦為革

革已日乃孚元亨利貞悔亡

此卦兩陰為主上陰窮亢故專主離陰全言火土之
用已日乃孚言至成土之日始孚契也據事而論則
是到安靜无為時乃始有成矣鮮曰已音紀十干之
名信也五性仁義禮智信唯信屬土不言戊而言已
離兌皆陰卦故言陰土日離也澤火相聚彼此相尅

必至成土乃始孚合亦如人之相忌相尅者其始豈能遽合必至彼此相信然後合志同心變易其相忌相尅之舊其中全是太和故克如乾而有其四德不至有悔也乾卦美利天下乃成始之妙革卦盡易故常是成終之事亦將有其始矣故能含有四德與乾之蘊蓄相同易卦止據象言理在人之旁通四達耳此卦止論金火之義五行唯火最烈故于四行皆能相入其于水木皆能化之使无故无革舊可言唯至

于金止能合散而為聚毀方而為圓鎔剛而為柔是
金之體質雖在而從前之形貌已更故云革所以然
者以金火皆懷土信也萬物生于土死于土此河圖
之五十所由歸中而艮卦之所由成終而成始也死
于土則革矣生于土所以有元亨利貞悔亡之美洛
書金火易位以其中有坤土也月令于金火之間置
中央土十于于丙丁庚辛之間置戊己土以金火之
性唯土始合離火燒兌金斷烈續之以土是其義也

乃字與坎字相對坎之中陽得于乾其最靈最妙唯此一陽故稱有字而又曰心亨此陽自乾九用來後此无窮之用皆由此始故曰革時大離之中陰得于坤土坤靜而无為以成終為德故革不言用而止言有字是作事之既成也既成則歸于鎮靜而更新之機已含于中因其尚非鼎新時故不言用此坎與革所由同言時也悔亡即從乃字見出因革故之難費過許多攻苦宜若有悔今既孚而成終故悔可亡是

悔者未到已日之事悔亡即乃孚之日故曰革之時
大也

彖曰革水火相息

說文作熄

二女同居其志不相得曰革已

日乃孚革而信之文明以說大亨以正革而當其悔乃

亡天地革而四時成湯武革命順乎天而應乎人

白虎通作

民革之時大矣哉

火燃則水乾水決則火滅相滅則非故而革義存矣
然息亦有生息之義為其中有土故有已日乃孚之

說離兌之陰皆土也兌得土以禦火則火不滅金而
兌得所生火得土以禦水則澤不滅火而火遂所生
相生則非故而革義又存矣此即物理以為革象革
卦伏蒙蒙生之始革舊之終也蒙艮為居坎為志二
女雖同居而離火志上兌水志下故不相得此即人
事以為革象已有音以者謂已革之日人乃孚信亦
與成土之後乃始孚合同是一義第作已成後說則
據理遺象而未有實據作成土說則據象言理而確

有可証字字不落空耳信字雖釋字字而已字亦在其中文明離也說兌也大亨以正即元亨利貞文明則能審乎革之理和說則能順乎革之情此據二體釋元亨利貞也革而不當雖革必悔今大亨以正則革而當矣故悔可亡天地以下又推廣言之以見革之時大也互乾伏坤地四時之季皆以土終故曰天地革而四時成此言造化也湯武句言人事也卦互乾巽乾天巽順故曰順乎天文別陰陽始為相應

初四俱陽非應矣五上天位而二三應之故曰順天
三人位二內卦之人位而五上應之故曰應人順與應
皆從方革時說字信之義造化與人事皆待孚而革故
曰革之時大睽革二卦皆屬離兌睽違則辭著相同相
通之義革堅固附著則辭著相息不相得之義周易之
所由為變易也

象曰澤中有火革君子以治厯明時

澤中有火謂火在澤中譬如以火鎔金逮于火入金

中而金形已非其故又如以火熱水火氣入水而水性已非其故所以為革又澤本注水今其中有火則非注水之舊所以為革治厯明時重明時邊治厯正所以明時也離為日伏坎為月蒙艮為星故言厯言時治者革中之經綸四時變易乃革之大者時即贊大之時故革之一卦全說時上道理

初九輦用黃牛之革

坤為牛黃中也離得坤黃中之爻故曰黃牛指二言

卦以離火革兌金下三爻主革者故初二三皆言革
上三爻受革故四言改五六言變離之主爻而乾陽
上下附之所以有火用薪傳之說離薪則火無自立
之理因其附于六二故遂以為輦于六二輦固也非
兩陽附于六二安得成離位卑无應則无能為矣故
小象明不可有為之說變艮止故不言革
象曰輦用黄牛不可以有為也

不曰无為但曰不可為陽剛之爻无位无應又艮止

也

六二已日乃革之征吉无咎

離為日陰土已象二為卦主故辭與卦同此爻變夬性健情悅故易革已日即孚字論時則必孚而後成革論卦主則必先孚乃能有所革陰土在中其孚可知正與不可有為相反故下遂言征吉无咎謂孚而有應也已日句仍是即物理以明之教之以不可驟征吉无咎方言人事為陰爻居中懼其中懈教之以

不可怠

象曰已日革之行有嘉也

行即征嘉即吉也變乾故言嘉

九三征凶貞厲革言三就有孚

比近澤水動則相息故征凶貞即不征然猶以為厲者乾三惕若之爻也革言革之議論也應兌口言象就成也商度其革之利害可否至再至三而議論始定也因上文征凶貞厲故慎重之三就離居三也因

在二卦往來之交上與陰應互巽進退不果故也有
孚即就也不孚不可為就仲翔曰將革而謀為言革
而行則為命三議革而後孚四既孚而後革

象曰革言三就又何之矣

何之云者謂有孚而就也然止是逆料之辭本草言
說

九四悔亡有孚改命吉

改命者到此已革也離交于兌改夏之命令于秋故

不言革而言改革去故時改新命時也四當往來變
易之際此正革而當者故悔亡蓋此是改時非革時
所以止言悔亡而不言革有孚變離而見坎象也論
人事則上孚五下孚民也然止是離兌相契耳互巽
變坎故言改命

象曰改命之吉信志也

變坎故言志謂九四之志見信於人也

九五大入虎變

變或作辨云
別也非也

未占有孚

陽剛中正而居尊位互乾爻故稱大人兌伏艮為虎
兌位西方亦為白虎五變互兌又為虎故曰大人虎
變變者仲夏希革仲秋毛毳非舊觀之謂也在大人
則自新新民移風易俗改朔易服順天應人也乾革
之五皆稱大人揖讓者見其德故稱龍征誅者見其
威故稱虎三四之孚水火相交之際必因孚而成革
五之有孚在未革之先四海後之心未占而巳有
孚也蓋下三爻皆方革之事上三爻說改命之事故

云然遯曰革伏蒙蒙初筮革未占人情賢夢卜之意
象曰大人虎變其文炳也

易俗移風改朔易服煥乎有文頓改舊觀也應離故
文明

上六君子豹變小人革面征凶居貞吉

革命之時鼓刀之叟佐命興周屠狗販繒皆開國承
家列土封爵此豹變也蓋九五既虎變而為天子上
六即豹變而為公侯豹亦虎類特虎大豹小此陽大

陰小之故陰爻亦象小人小人指百姓兌為口乾為首口在首上故象面革面言舊日之面從乎君者亦革也蓋以力服人者面從者也以德服人者中心悅而誠服也征凶者聖作物覩別有所往則為梗化之頑民而凶矣必能守改革之命斯正而吉乘陽失正故征凶得位有應故居貞吉一說君子亦指在下者一說征凶指革命者謂革命之事原非得已不可過為紛更即既安之勿擾之也蓋爻之吉凶皆論本爻

不可推開與本文无干後說稍勝

象曰君子豹變其文蔚也小人革面順以從君也

炳則昭若日星蔚則止言其盛冠裳文物氣象一新是也應離故文炳應巽故文蔚君謂五以陰變乾故曰順以從君兌悅則順應巽亦順即中心悅而誠服也



巽下
離上

鼎者烹飪之器其卦初偶下峙為足二三四陽為腹

五偶中虛為耳上陽橫亘為鉉中互乾兌以乾金承兌澤有似鼎實足以承腹以實耳以行鉉以舉鼎象又巽木入離火而致烹飪鼎之用也

鼎元吉亨

本義曰吉衍文謂彖傳中是以元亨不言吉也然革言元亨利貞彖止曰大亨以正萃言亨利貞彖止曰利見大人亨聚以正也皆无利字蓋元亨四者卦德也則不可畧吉利字占也則不妨於畧吉非衍也占

也有變化萬物之能故稱元有利養萬物之德故稱
吉達諸天下而必不可无故言亨

彖曰鼎象也以木巽火亨飪也

亨普庚切飪入甚切說
文作孰飪馬作亨飪

聖人亨以享上帝而大亨以養聖賢

郭京易舉正无
而大亨三字 巽

而耳目聰明柔進而上行得中而應乎剛是以元亨

楊謂

中脫吉字或有然也謂
聖人亨下是文言則非

下木上火互見兌乾乾金兌澤金而含水爨以木火

烹飪象巽入烹煮也飪熟食象者鼎之體烹飪鼎之

用烹飪之用无過祭祀賓客祭祀之大者无過上帝
賓客之重者无過聖賢享上帝貴誠用犢而已故止
曰享享聖賢貴豐饗殮牢醴皆須極盛故曰大亨離
為目伏坎為耳故兼言耳目坎爻曰聰不明也明亦
兼言目也柔進者離為柔卦為主中柔也巽順者木
火相依聰明者火得水之生氣也上行得中而應剛
言主爻也卦主二柔而巽柔不主者初微也內巽外
明有其德上行得中有其位應乎剛有其輔是以元

亨

象曰木上有火鼎君子以正位凝命

火生于木却在木上而不能離木在木上則位正于上此上行得中有應之義故曰正位火不能離木而別為火有似凝成堅定于木此火以木為命之義故曰凝命曰上便具正位之義曰上有便具凝命之義若論人事正凝二字仍有工夫矣鮮曰正對偏倚言凝對散漫言命天命凝命者天命凝承堅固國家安

于磐石所謂協于上下以承天休也鼎譬之位命譬之實鼎之器正然後可凝其所受之實君之位正然後可凝其所受之命鼎綜革故革亦言命照按言命者皆巽革互巽故也野同錄曰井鼎皆以生氣為命井木上有水津液自木出鼎木上有火英華自木生也

初六鼎顛趾利出否

或以否作否音透非也

得妾以其子无咎

在下伏震足趾象長女位卑居下妾象震長子子象

凡言伏象者皆本象所无以其子非已有子豫透之
詞也鼎為寶器主器莫若長子故言子顛趾倒其趾
也凡洗鼎出垢必倒其趾以足加于上因足動故象
顛否者鼎中之汙穢當卦之初鼎尚未實其舊有否
惡之積顛而出之斯為利矣得妄顛趾出否猶言顛
趾為出否也得妄為子也妄卑于妻得妄而以其子
是因敗以為功因穢以致潔因賤以致貴之義是則
否之出也雖若鄙褻然利在其後有何咎集曰初弱

巽跛顛趾象初應鼎口出否象互大過顛象頤之顛
與大過反對也白沙曰爻見二陰五貴初賤妾象
象曰鼎顛趾未悖也利出否以從貴也

未悖未悖于理也言顛趾于鼎上雖若上下倒置然
初未有實而洗之豈為悖理貴對賤言否則賤矣以
從貴者言欲以貴重之物相從而實諸鼎不得不出
其否賤以致潔從貴即利字之義

九二鼎有實我仇有疾不我能即吉

鼎既洗矣乃實物于中實五之陰也鼎口之上五陰
應之如實物于鼎故曰有實從前俱曰陽實陰虛至
當位實也則說不去矣來矣鮮本舊註俱以初之陰
柔為疾初與二比則非不我能即之義二五陰陽相
得亦不可以仇讐言之仇匹也全由火能焚木起義
蓋離火為用原屬外陽應五則在中之陰質是火之
所以為命者鼎實初具火用方興生火之物方自顧
不暇故曰匹我者有疾也是應則為匹尅則為仇耳

火之炊物必无一蹴遽熟之理馴而致之乃可有成
故以不我能即為吉又因此爻與離火相去尚隔九
三故也

象曰鼎有實慎所之也我仇有疾終无尤也

慎所之往應五也顛趾者動也此爻居中安靜故但
欲其我即則二之慎往可知見曰仇五也中互兌金
金為木仇

九三鼎耳革其行塞雉膏不食方雨虧悔終吉

三變離坎坎為耳革變也中互兌離正當相交之爻
故言革坎為耳痛耳革象三未變伏震行變坎陷則
不能行行塞象離文明為雉坎為膏中互兌三變不
成兌口不食象變則內外皆坎方雨象鼎以耳行三
以木極上應火極又當變革之位則鼎中騰沸並耳
亦熾熱變革不可舉移故其行塞雨水也虧損也悔
者鼎不可舉則雉膏之美不得食不免于悔方雨虧
悔者言耳革不食唯救以水耳方雨則虧損其騰沸

熾熱之勢而不至悔也化重坎故也終吉者鼎可移
美可食也筌曰下體有足无耳故耳革上體有耳无
足故足折

象曰鼎耳革失其義也

木火烹飪適中方為得宜太過故失宜爻无應不必
言應

九四鼎折足覆公餗

馬作粥

其形渥

鄭虞作刑劉元載傳引之

凶

四變互震足遇兌毀故折足鼎實近耳滿矣今震動

覆象餗美糝鼎實也鼎以享帝養賢非自私也故曰
公餗又四亦公侯之位渥霑濡也言鼎覆而霑濡美
糝故為形渥晁氏引周禮剋誅之說作形剋謂重刑
不必也居大臣之位其任重矣不中正而下應陰柔
則委任非人不勝其任卒至覆敗也

象曰覆公餗信如何也

信信任也大臣見用于君率以康事寧人自期許今
乃用人不當至敗乃公事則向日之期許為何如也

見失信于君必至形渥也此以信為大臣之自相期
許以四應初陰為用人不當此解為正一曰所用之
人將餽覆之則所信任者為如何也一曰向決必覆
之理而人不信今如何也二說姑存之

六五鼎黃耳金鉉利貞

五陰兩圻又伏坎故為耳黃中坤色五坤陰得中黃
耳象鉉貫耳之物未變為坤故曰黃既變為乾故曰
金耳受鉉以舉鼎鉉貫耳以行鼎原不相離故并言

之動而得正故曰利貞五有中德故其色黃比剛應
剛變剛故其質金是執中居尊已足凝命而又能任
賢有鼎黃耳貫以金鉉之象此所由利而貞也利言
其及物貞言中德也然享帝養賢皆在此爻

象曰鼎黃耳中以為實也

二曰有實外之也見非其有而有之言應也此曰中
以為實中五之位陰實之質此亦以實字說在陰爻
上九鼎玉鉉大吉无不利

鉉在鼎上上居鼎極故象鉉荀以變震為玉不知金
玉皆乾也特自陰而變則象金質之重濁本為陽爻
則象玉光之外煥參同契謂陰金陽玉亦本于此玉
本不可為鉉與金車同義言象而已鼎之為器承鼎
在足實鼎在腹行鼎在耳舉鼎在鉉鼎至于用鉉則
厥功成矣功成可以養人故大吉无不利子瞻曰在
炎不灼者玉也

象曰玉鉉在上剛柔節也

剛柔節謂與五陰相接此剛五柔即貫耳舉鼎之說
若論全象即水火均調變生為熟也五之金鉉藉上
力也此之剛柔節即下比五陰水火既濟不煩再用
火言功之成也耳革者比剛乘剛故革此比陰故節



震下
震上

震動也坤本靜體一陽始于下則不靜而動矣因
動故象雷雷者陽氣之動也因其始生故象長子

震

歸藏
作聲

亨震來虩虩

音原荀
作愬愬

笑言啞啞

音厄以惡亞厄
噩古同轉也全

書從古文
无此二句

震驚百里不喪匕鬯

乾動坤靜一陽來于坤中此正乾元方動之機故元
後曰亨亨與塞反塞者靜體亨者動機果能變動自
當易塞而亨故震自有亨理亨不言于他卦而言于
震震初得乾亨也虩虩驚動貌虩本壁虎其捕蠅恒
驚顧而不安故象之啞啞笑聲也虩虩初動之形啞
啞初動之聲凡靜皆寂物靜則聲隨之而寂笑言者
伏互兌口有喜悅言語之象虩虩震也啞啞亨也此

常也震驚百里不喪匕鬯變也然止實上二句以見震之亨耳坤為邑陽自外來為主于坤君主百里之象出帝之長子故為君有謂一陽二陰之策數為百里不知艮坎皆一陽二陰也西南得朋故不喪互艮手執之亦不喪互艮為宮闕坎為隱伏為叢棘故象匕匕以棘為之長三尺未祭則烹牢于鑊將祭則以匕出之升于俎上坎為水故象鬯鬯以秬黍酒和鬱鬯以灌地降神也匕鬯亨具也不喪從震而又震見

出到得不喪匕鬯方見得震之亨

彖曰震亨震來虩虩恐致福也笑言啞啞後有則也

全書

亦畧此四句照按此初象之錯簡也

震驚百里驚遠而懼邇也

舉正有不喪匕鬯程

傳宗之范謬昌隆簡亦同

出古人先此字

可以守宗廟社稷以為祭主也

當如舉正補不喪匕鬯四字震本驚動乃曰亨者凡人寂无所感則此心潛匿莫由自達故蒙昧之人忽然觸之而動則達者機也故為震亨亨字即震字天下事唯心无所懼故不免多懼今既震懼便是轉移

之機那得不亨恐者懼也生全出于憂患自足以致福也凡福慶之來多見震懼之形蓋大反其故常必先見異耳笑言動象也後者震得初陽正克見天心時由此而進則後矣謂震驚恐懼後也論象則九四當之坎為法則即乾之天則為克見天心也在人事則中節之和率性之真由太和各正而來故云天則論理則震之初陽當之驚者卒然遇之而動于外懼者惕然畏之而變其中遠外卦通內卦懼者已之獨

知驚者連類而及皆動象出者長子繼世而出也坤
本无陽而最初見此若打初出現者然艮宮闕坎隱
伏故言宗廟社稷言事幾來于倉卒如雷之震遠邇
驚懼人易失其常度乃能處之從容誠敬自守不喪
匕鬯則是不懼由于能懼豈不可以負荷天下重器
而為祭主乎此震之所由亨也周易本言性之書泛
解何當

象曰洊雷震君子以恐懼修省

游再也凡人之心偶然一動終復何益唯動而又動
故恐懼修省卦主兩陽而初為內主懼者在中之事
故但言恐懼而不及震驚細玩象詞則震之一卦豈
不全是身心性命中事

初九震來虩虩後笑言啞啞

古作
笑語吉

卦有兩陽而初為最先是在中之爻故與卦同詞明
卦主也加一後字則四陽亦止是亨中事矣論象則
內懼而外驚論文則初四皆陽乃震之所以為震者

二三五上陰也乃為陽所震者初乃成卦之主又處震初故其占如此

象曰震來虩虩恐致福也笑言啞啞後有則也

解見卦辭若非前後相形必无則之可言

六二震來厲

句

億

句

喪貝

古億作噫

躋于九陵

古躋作臆

勿逐七

日得

當震動時比初九之剛故震來猛厲也億虞翻作惜詞程子曰度也謂度不能當也矣鮮曰大也引六五

小象大无喪為証

煦

按當從古作噫嘆詞也驚詞也

此震驚之聲正象辭笑言之義蓋卦主二陽陽動爻也懼爻也其餘驚爻也二比初之動五比四之動是動之最先覺者故皆有此驚嘆之聲若上隔五則以為隣矣貝介蟲變離龜蚌剛物也初陽象震足躋象艮山陵象陽九象離日象二陰本與初陽相得今動而相失故嘆其喪貝蓋二陰中而初陽外自陰目陽故曰貝中互艮二坤土在艮山之下故象陵居陽九

之上故象躋躋于九陵九者老陽之動正喪貝之象
七日者卦止六位相循不息所以為易終而始始而
終上而下而上中而外外而中皆不息也窮上返
下至于初陽其數七故復稱七日七日得不言于初
而言于二初為七日來復得朋之爻故不得重言得
也此爻乘初陰而不陽陽動于下故先言喪爻居初
上一變又復為陽故云七日得言同初耳七日正躋
九陵之故震行故言逐艮止故勿逐爻變不成艮亦

勿逐人心方動必先有所喪然後有所得如喪妄則得誠喪戾則得和是也譬彼愚人纔動于一隙之明則從前之蒙昧者喪而明者得矣爻見艮震故言喪得喪陵之義得躋之義也

象曰震來厲乘剛也

唯其乘剛所以猛厲其喪其得皆在厲字中

六三震蘇蘇震行无青

蘇者動而明也即禮記蟄蟲昭蘇之蘇盖由靜方動

由昧方覺之象變離故明正是不自覺而驚懼之意
又上下震相接之爻故連用兩蘇字初陽動于積陰
之下三為人爻位在地上故與蟄蟲相似互坎多眚
三變不成坎故无眚行是震之本象覺之又覺如此
而行何至有眚此爻止說明而後行之義震者明德
之初幾艮者反身而誠之妙用震動之初何明可見
故初止言恐懼而不及明三到動極乃始以蘇蘇言
微明明而後行故其下方說出行字

象曰震蘇蘇位不當也

不中不正故不當此只解蘇蘇二字蘇蘇故行无咎

九四震遂泥

荀作
隊泥

遂者順而不返之意泥者溺于險陷而不能奮發也
坤土得坎水泥象初四皆震主初陽得正故動而獲
吉四處柔而剛不足不中正而德不足陷于二陰是
无能為之才而又溺于晏安之私者遂泥則難為動
矣宜曰再動其氣虧

象曰震遂泥未光也

坎陽既陷无復光明正大之事與屯萃未光同

六五震往來厲

句億句

无喪有事

內為來外為往初震于中來之厲也四震于下往之厲也往來皆厲故驚嘆也无喪即得也二五皆因初四而動然二五在中故皆无喪二之得喪此之无喪皆從不喪七也來蓋動則必有得喪二之喪得乘剛而居柔是不能有行者故言勿逐此乘陽居剛是必

能有行者故无喪有事也且內體而外用故有事凡事行于外則不无得喪若于幾之將動全未有喪之時即有事以收攝之此即不遠之復何至喪失周易全言性中之事故小象曰其事在中

象曰震往來厲危行也其事在中大无喪也

危行者一往一來皆危也中雖指外卦之中却是說未發之中顏子之復即无喪因其故然非可言得故止言无喪

上六震索索視矍矍征凶震不于其躬于其隣无咎婚
媾有言

索求取也震而又震不安甚矣然處窮極將反之地
故索而又索以求寧也矍矍視徬徨也震動之極却
非身之自動故視之審以求寧視變離明也然皆因
隣而及徃以求人則必致凶故求寧雖切而必視之
審也索索矍矍與蘇蘇同皆謂重震然實非自身之
咎乃隣之貽自身之事則恐懼修省可矣因隣而及

故于自身无咎知其因隣而備之遲將婚媾有言矣
婚媾者與隣相契之象離震相隣火不離木亦相隣
之義有言者木上生火木固有聲火甚亦有聲也是
爻變之象明夷之言中孚之泣歌離之歌嗟皆離震
也凡言隣者皆先天圖中相比之卦或見于本卦或
見于變卦如小畜五泰四謙五既濟五皆是也言遇亦同
此義凡言婚媾皆先天圖相對之卦相對則有相配之義
故或見于本卦或見于變卦多言婚媾雖多見于震坎相

遇然屯之二四兩變則先天之艮兌後天之震兌皆具也
賁互震坎四變則先天艮兌後天之震兌皆具也睽上變震
互坎中又坎離先後天皆相對此又互坎變離故言婚媾
象曰震索索中未得也雖凶无咎畏隣戒也

中中心也未得方寸亂而不得寧也初四得陽二五
得中此處窮極故未得畏隣戒者畏禍已及隣而先
自戒脩故无咎



艮下
艮上

艮止也陽自下升極上而止合溪從反見為目止庵
從目下几精蘊曰目乃漏泄之總人心緣感出入非
目則感不成注云斂目无所見即反見之義煦按聖
人立卦皆據陽而論如震起艮止是也其中實中虛
下斷下缺莫不據乾而言貴陽也震者克己復禮之
心法所謂幾者動之微也艮者反身而誠之妙諦所
謂行其庭不見其人也

艮其背不獲其身行其庭不見其人无咎

來矣鮮面背上下之說據震而言綜卦此似是之理
却非實義觀彖詞艮其止另釋下三句用是以字貫
之則不應如此分釋爻詞四句止是一義坤土靜故
止于其所一陽高出于地上山象陰靜而陽動動而
至于其極止象萬物負陽而抱陰人身亦如之故遂
以陽為背艮陽後成之爻也脊骨屹然直立如山之
有石故艮之象為山艮卦全象人身故彖辭遂舉人
身心之內外言之大象云思不出位是言心也周子

一部楞嚴不如艮卦所以有守靜之學連山首艮亦是此旨蓋天下絕大經綸俱從靜定後做出來人之一身呼吸迴旋百脈流注何有止息唯背則屹然不動故于背而象止心有所止則內不見己外不見人若使內猶見己外猶見人非止矣庭者心之舍也艮為門闕純艮則重其門闕兩門之間庭象下陰兩分而中虛上覆以陽與剝廬同象故也互震為行坎為隱伏故曰行其庭不見其人此正艮背不獲之義陰陽之道陽无陰有陽

虛陰實陽動陰靜唯動則有行象唯无與虛則有不獲
不見象象山曰不獲其身无我不見其人无物觀象山
此解最為真切今之偽道便薄為空宗矣試觀子思未
發之中是何如景象今之不獲不見又是何如景象特
无我而我未嘗不在无人而人未嘗不存耳釋氏老氏
不聞薄儒儒者偏薄釋老亦見其量之狹矣夫蛟龍之
習于水也不聞謂飛空者之非也禽鳥之飛于空也不
聞謂行地習水者之非也各學其學則亦各有至耳

彖曰艮止也時止則止時行則行動靜不失其時其道

光明艮其止

晁氏及纂言作艮其背

止其所也上下敵應不相與

也是以不獲其身行其庭不見其人无咎也

觀動靜不失其時則知行有止時止亦有止時凡止
皆由行看出止者行之終也行而不行斯止矣故曰
靜止其所止斯行矣故曰動因前止後止知其中必
有一行故兼言行不然則无以顯後之一行然其行
在兩止中非如震動之行在外可見故但曰行庭互

坎故言時即不失其信時用之義光明者艮陽在外
篤實輝光也此上專釋艮字之義不相與者謂陰陽
不相應也相應則相契故有往來同德而相敵則无
相契之義故各止其所艮為獨知之事則我原不能
同人我方不獲其身則人又焉能同我故不相與也
此上釋背字之義然下三句已在其中故但用是以
字貫之張子曰靜而无靜動而无動陽明曰惡動之
心非靜求靜之心亦動艮為止卦顧乃言行由相形

而見也周易之妙到不可言說處必取切近者形之如中不可言則于兩頭言之內不可言則于外面旋繞者言之元不可言則言資始乾不可言則言先甲後甲震不可言則言先庚後庚皆此類

象曰魚山艮君子以思不出其位

重山則內外前後皆止矣止必有位故言位天下之理即位而存不出云者所以止乎其理也象言時此言位對舉也

初六艮其趾

荀作止

无咎利永貞

初在下為足爻故象趾震下陽動故行艮下陰靜故止才柔居下能自止而不行故无妄動之咎止所當止故言利貞方在初爻故欲其永初陰靜止故與坤之用六同辭

象曰艮其趾未失正也

謂止所當止初卑在下而才柔故也

六二艮其腓

古一作肥

不拯其隨

釋文作不承一行作不拊

其心不快

腓足趾在趾上艮象人身以次而上故趾與腓亦以
次進而上拯救隨從也二之所隨為三卦以三陽為
主也因三陽剛躁進已到極處又為列蠱薰心之爻
必所當拯二則陰柔居中三又傲然上進故不能拯
三所以象曰未退聽未退便是說三之已進因坎象
故言聽在三下故言退未退象三之躁進而傲也互
坎為心病不快象不快者未遂拯心也

象曰不拯其隨未退聽也

三上而二下故曰退陰以比陽為善乃陽性上進不復下降安能退聽此因二之中正覺三之上進而不得所安故欲拯之使如已也乃所拯不遂者以三之未能退聽也周公不快主坎之心病焉孔子未聽主坎之耳痛言

九三艮其限列其夤

鄭作腴說文作肿荀作腎孟喜列作裂

厲

韓嬰作危

薰心

公羊及虞氏作闡心艮為闡守門人坎盜動門故厲闡心古闡作薰字

限界限上身下身之界即腰也兩卦相接故象限夤

連也腰之連屬處也一曰脊骨能屈能伸者凡柔不能自轉人身上下皆轉于骨此為剛爻剛而止則不能屈伸今艮其限則上下不相連屬故為列彖列者裂絕而不連屬判然兩分故危薰同熏火烟上也薰心心不安也二曰未退見陽之不能下此曰薰心見陽之上也然止曰薰三固止爻也坎伏離火烟象自其止于下故曰列彖自其連于上故曰薰心

象曰艮其限危薰心也

與下成止則艮其限與上成震則危薰心薰字從限
字出

六四艮其身无咎

心交也心之所止身自隨之心不可見故言艮身身
既艮矣則无所作為故无咎揆曰以心治身即以身
治心

象曰艮其身止諸躬也

不能治人不能成物唯止諸躬而已與坤四无咎咸

四无悔同類揆曰二三身位而曰心四心位而曰身
可悟身心合一

六五艮其輔言有序

虞李作字

悔亡

輔見咸註艮伏兌為口舌輔象言象論位亦當口舌
之位也艮為止在坎車上故言輔輔車相依是也艮
輔者言不妄發發必當理也悔者易則誕煩則支肆
則忤悖則違皆悔也咸卦多象人面故并見頰舌艮
卦全象人背故獨言輔艮在言行上見趾腓象其行

輔象其言五以陰居陽不正懼有失言之悔以其得中故有艮輔有序悔亡之象

象曰艮其輔以中正也

古作以正中

當依古作正中或謂正字美或謂正當作止皆不必上九敦艮吉

敦篤也止而又止則厚矣故敦臨敦復皆以土取象剛而居上止有其終則俯仰皆安何吉如之羽南曰爻象人身上獨不言而曰敦艮所謂不獲其身不見

其人者歟艮居上八體皆吉煦按知止貴其有終故
三凶而上吉

象曰敦艮之吉以厚終也

敦厚于終无間于始故吉坤為厚陽上據坤故曰厚
終

周易函書約註卷十